

BOSNA I HERCEGOVINA
FEDERACIJA BOSNE I HERCEGOVINE
PARLAMENT FEDERACIJE
DOM NARODA

Broj: 02-02-7-987/16
Sarajevo, 2. 6. 2016. godine

Z A P I S N I K

**13. sjednice Doma naroda Parlamenta Federacije Bosne i Hercegovine,
održane 2. juna 2016. godine**

Sjednica je počela u 12:50.

Sjednicom je predsjedavala Lidija Bradara, predsjedavajuća Doma naroda Parlamenta Federacije BiH.

Na početku sjednice, predsjedavajuća je pozdravila delegate, zamjenicu premijera Federacije Bosne i Hercegovine, gospođu Jelku Milićević, ministre u Vladi Federacije, predstavnike akreditiranih medijskih kuća i goste.

Na osnovu evidencije Stručne službe, predsjedavajuća je konstatovala da sjednici prisustvuje 51 delegat, što čini većinu i da Dom može raditi i punovažno odlučivati, te da su izostanak sa sjednice opravdali delegati Amor Mašović i Ismet Sarajlić.

Prije nastavka, Domu naroda obratio se predsjednik Kluba delegata srpskog naroda, Slaviša Šućur. Zatražio je da Dom izabere potpredsjedavajućeg iz reda srpskog naroda kako bi bila ispunjena ustavna obaveza vezana za sastav rukovodstva Doma naroda.

Započela je diskusija u kojoj su učestvovali: Lidija Bradara, Jasenko Tufekčić, predsjednik Kluba delegata hrvatskog naroda Tomislav Martinović, Predrag Kojović, Osman Ćatić, predsjednik Kluba delegata bošnjačkog naroda, Slaviša Šućur, Draženka Subašić, Aner Žuljević i Daliborka Milović, koja je najavila povlačenje kandidature za potpredsjedavajuću Doma naroda.

Slaviša Šućur je izjavio da se Klub delegata srpskog naroda ne tretira jednako kao klubovi bošnjačkih i hrvatskih delegata. Pozvao je Visokog predstavnika za BiH da riješi nastalu situaciju i pozvao članove Kluba delegata srpskog naroda, odnosno onaj dio koji je tražio nastavak 12. sjednice i glasanje o prijedlozima odluka za izbor potpredsjedavajućeg iz reda srpskog naroda, da napuste sjednicu.

Nakon što je većina članova Kluba delegata srpskog naroda napustila sjednicu, predsjedavajuća je zatražila pojedinačnu prozivku i

konstatovala da sjednici prisustvuju 42 delegata, što čini većinu te da Dom naroda može raditi i punovažno odlučivati.

Predsjedavajuća je dala na glasanje Zapisnik 11. sjednice, održane 31. marta i 14. aprila 2016. godine i, na osnovu rezultata glasanja, konstatovala da je Dom, bez primjedbi i sa 38 glasova za, usvojio Zapisnik 11. sjednice.

Predsjedavajuća Doma naroda, na osnovu člana 104. Poslovnika o radu Doma naroda Parlamenta Federacije Bosne i Hercegovine, pozvala je delegate da, ukoliko žele, postave delegatska pitanja i pokrenu inicijative.

Delegatska pitanja i inicijative

Osman Ćatić, u ime Kluba delegata bošnjačkog naroda, pokrenuo je inicijativu kojom je zatražio od Vlade Federacije da u roku od 30 dana predloži donošenje kriterija i donese odluku o raspodjeli budžetskih sredstava nižim nivoima vlasti, sa posebnim osvrtom na Bosansko-podrinjski kanton Goražde i kantone u kojima je ugroženo ostvarivanje osnovnih funkcija propisanih Ustavom Federacije i drugim propisima.

Lejla Imamović je pokrenula inicijativu kojom je zatražila od Vlade Federacije da što hitnije formira privremenu stručnu komisiju koja će Vladi i Parlamentu Federacije predložiti provođenje hitnih mjera s ciljem zaštite Javnog servisa Radio-televizije Federacije BiH od lošeg poslovanja Javnog servisa Radio-televizije BiH. Predložila je uvođenje novog modela naplate takse za Javni RTV servis Federacije putem poreza.

Aner Žuljević se osvrnuo na odgovor koji je dobio na pitanje u vezi pomoći institucijama kulture.

Postavio je pitanje Vladi Federacije i nadležnom ministarstvu u vezi podnošenja zahtjeva za subvenciju zapošljavanja mladih, nezaposlenih osoba bez radnog iskustva ili zahtjeva za subvenciju samozapošljavanja.

Zatražio je od Kolegija Doma naroda zakazivanje tematske sjednice na kojoj bi Dom raspravljao o pismu namjere kojeg je potpisao premijer Federacije i dostavio Međunarodnom monetarnom fondu.

Slobodan Tomić je od Federalnog ministarstva poljoprivrede, vodoprivrede i šumarstva zatražio spisak imena 66 poljoprivrednika iz Zapadnohercegovačkog kantona kojima je odbijena aplikacija za novčane poticaje za sjetvu krompira sa obrazloženjem razloga odbijanja.

Đuro Prkačin je postavio pitanje predsjedniku Vrhovnog suda Federacije BiH, a ono glasi: Kada će biti raspisan konkurs za mjesto povjerenika Odjeljenja sudske policije sudova u Hercegovačko-neretvanskom kantonu sa sjedištem u Mostaru?

Anes Osmanović je postavio pitanje i pokrenuo inicijativu.

Pitao je da li su ministri i ministricе Vlade Federacije posjetili sve kantone u Federaciji BiH i da li su upućeni u aktuelne probleme iz nadležnosti ministarstava koja vode. Pokrenuo je inicijativu kojom je zatražio od Vlade Federacije da ministri i ministricе koji nisu posjetili sve kantone učine to najkasnije do početka godišnjih odmora.

Željko Josić je pitao Vladu Federacije što će poduzeti u vezi rješavanja tužbi Saveza općina i gradova Federacije BiH u vezi smanjivanja prihoda sa Jedinственog računa PDV-a zbog vraćanja duga Međunarodnom monetarnom fondu, čime je otežano ispunjavanje funkcija jedinica lokalne samouprave. Također, pitao je Vladu Federacije što će poduzeti da jedinice lokalne samouprave ne budu uključene u vraćanje kredita u kojima ne učestvuju niti ih koriste.

Emir Frašto je pitao Vladu Federacije koliko oružja ima po kantonima, a naročito o broju dugih cijevi, što se odnosi i na Federalno ministarstvo unutrašnjih poslova. Pitao je i koliko je sredstava iz Budžeta Federacije za 2016. godinu namijenjeno za nabavku dugih cijevi i kako će biti raspoređeno po kantonima.

Segmedina Srna Bajramović je postavila pitanje Vladi Federacije i nadležnom ministarstvu u vezi donošenja strateškog dokumenta ili akcionog plana u cilju definisanja neophodnih mjera i aktivnosti populacijske politike.

Amil Buljubašić se osvrnuo na odgovor dobijen na pitanje u vezi usklađenosti izmjene Uredbe o naknadama koje nemaju karakter plaće koje pripadaju članovima Vlade Federacije, njihovim savjetnicima kojim se izjednačavaju prava na naknade članovima Vlade Federacije i savjetnicima sa naknadama koje neprekidno uživaju članovi domova Parlamenta Federacije BiH sa Zakonom o plaćama i naknadama u organima vlasti Federacije BiH.

Zatražio je dopunu odgovora na pitanje kada je tačno pokrenuta inicijativa za izgradnju pješačke staze na dionici puta M4 u Općini Tešanj.

Mirvet Beganović je postavio pitanje Vladi Federacije u vezi implementacije Programa za uvezivanje radnog staža radnicima u preduzećima koja su u većinskom državnom vlasništvu. Upitao je na kojim područjima se nalaze i da li je i Agrokomerc jedno od njih.

Damir Jukić je postavio pitanje direktoru Porezne uprave Federacije BiH u vezi odabira najboljih kandidata na konkursu za prijem šest federalnih poreznih inspektora u Kantonalnom poreznom uredu Zenica.

Admir Hadžipašić je postavio dva pitanja.

Prvo pitanje uputio je Federalnom ministarstvu energije, rudarstva i industrije i JP Elektroprivreda BiH, a tiče se rekonstrukcije niskonaponske mreže na području Unsko-sanskog kantona i realizacije zaključaka usvojenih na Tematskoj sjednici Doma naroda nakon razmatranja stanja u elektroenergetskom sektoru u Federaciji BiH.

Federalnom ministarstvu rada i socijalne politike uputio je pitanje u vezi upisivanja ratnog staža u radnu knjižicu.

Nakon delegatskih pitanja, predsjedavajuća je obavijestila delegate da je rukovodstvo Doma naroda razgovaralo sa predstavnicima Udruženja Švicarac u vezi Prijedloga zakona o konverziji kredita sa valutnom klauzulom u švicarskim francima (CHF) u konvertibilne marke (KM) kojeg je predložila Komisija za ispitivanje zakonitosti plasmana kredita u švicarskim francima u Predstavničkom domu po hitnom postupku. Predsjedavajuća je obavijestila delegate da je uputila dopis radnim tijelima da razmotre Prijedlog zakona. Predlagač ovog zakona nije bio na sjednicama radnih tijela te će Dom naroda razmatratrati ovaj prijedlog na jednoj od narednih sjednica.

Budući da nije bilo prijedloga za izmjenu i dopunu dnevnog reda, predsjedavajuća je obavijestila delegate da je Vlada Federacije BiH dostavila Prijedlog zakona o izmjenama i dopunama Zakona o izvršnom postupku s prijedlogom da bude razmatran po hitnom postupku.

Na osnovu rezultata glasanja, predsjedavajuća je konstatovala da je Dom naroda Parlamenta Federacije BiH sa 31 glasom za, jednim uzdržanim i dva protiv, prihvatio da Prijedlog zakona o izmjenama i dopunama Zakona o izvršnom postupku bude razmatran po hitnom postupku.

Predsjedavajuća je, zatim, konstatovala da je Dom naroda Parlamenta Federacije BiH sa 31 glasom za, dva protiv i jednim uzdržanim, usvojio sljedeći

D N E V N I R E D

1. Prijedlog zakona o izmjenama i dopunama Zakona o izvršnom postupku - hitni postupak,
2. Prijedlog zakona o nedopuštenom oglašavanju,
3. Prijedlog zakona o poljoprivrednoj organskoj proizvodnji,
4. Prijedlog zakona o finansijskom poslovanju,
5. Nacrt zakona o veterinarsko - medicinskim proizvodima,

6. Izvještaj o radu Fonda za profesionalnu rehabilitaciju i zapošljavanje osoba sa invaliditetom Federacije BiH za 2015. godinu, Izvještaj o izvršenju finansijskog plana za 2015. godinu,
7. Izvještaj o izvršenju Budžeta Federacije Bosne i Hercegovine za period 1. januar - 31. decembar 2015. godine

1. Prijedlog zakona o izmjenama i dopunama Zakona o izvršnom postupku - hitni postupak

Prijedlog zakona utvrdila je Vlada Federacije.

Predstavnički dom Parlamenta Federacije obavijestio je Dom naroda da je na 12. Vanrednoj sjednici, održanoj 30. 5. 2016. godine, usvojio Prijedlog zakona o izmjenama i dopunama Zakona o izvršnom postupku u tekstu kako ga je predložila Vlada Federacije.

Prijedlog zakona razmatrala su nadležna radna tijela i dostavila svoje izvještaje.

Na Prijedlog zakona Almedin Aliefendić je podnio amandman koji se odnosi na član 138. Zakona.

Vlada Federacije dostavila je izjašnjenje kojim ne prihvata ovaj amandman.

U raspravi su učestvovali: Aner Žuljević, Mirvet Beganović, Rasim Dostović, Almedin Aliefendić, predsjednik Kluba delegata bošnjačkog naroda, Osman Ćatić, Admir Hadžipašić i federalna ministrica finansija, Jelka Milićević.

Aliefendić je kazao da odustaje od amandmana, a Ćatić je, u ime Kluba, predložio zaključak.

Na osnovu rezultata glasanja, predsjedavajuća je konstatovala da je Dom naroda Parlamenta Federacije BiH, sa 31 glasom za, četiri protiv i dva uzdržana, usvojio Prijedlog zakona o izmjenama i dopunama Zakona o izvršnom postupku.

Dom se, zatim, izjasnio o zaključku koji je predložio Klub delegata bošnjačkog naroda.

Na osnovu rezultata glasanja, predsjedavajuća je konstatovala da je Dom naroda Parlamenta Federacije BiH, sa 35 glasova za i jednim uzdržanim, usvojio sljedeći

ZAKLJUČAK

Obavezuje se Vlada Federacije Bosne i Hercegovine da, zajedno sa vladama kantona i Savezom općina i gradova Federacije Bosne i Hercegovine, do usvajanja narednog Budžeta Federacije Bosne i Hercegovine, sagleda situaciju na nivou Federacije Bosne i Hercegovine i predloži cjelovito i sistemsko rješenje problema tužbi po osnovu radno-pravnog statusa.

Predsjedavajuća je predložila da Dom razmotri 4. tačku Dnevnog reda zbog obaveza koje ima federalna ministrica finansija, što su delegati prihvatili.

4. Prijedlog zakona o finansijskom poslovanju

Prijedlog zakona utvrdila je Vlada Federacije.

Predstavnički dom Parlamenta Federacije obavijestio je Dom naroda da je na 11. sjednici održanoj 18. 5. 2016. godine usvojio Prijedlog zakona o finansijskom poslovanju sa jednim Amandmanom, kojeg je Vlada Federacije prihvatila pa je postao sastavni dio Prijedloga zakona. Amandman se odnosi na član 18. stav (4).

Amandman glasi:

U članu 18. stav (4) mijenja se i glasi:

„(4) Radnjama iz stava (3) ovoga člana naročito se smatraju: preusmjeravanje novčanih i finansijskih tokova na druge osobe, davanje zajma, isplaćivanje predujma dobiti ili dobiti, isplaćivanje dividende, obavljanje prijenosa prava na treće osobe, naročito na povezana društva, nabava putničkih automobila i rezervnih dijelova za takva prijevozna sredstva, izdaci za poslovne zabave i smještaj i izdaci obveznika za reprezentaciju.“.

Prijedlog zakona razmatrala su nadležna radna tijela i dostavila svoje izvještaje.

U raspravi su učestvovali Admir Hadžipašić i Jelka Milićević.

Na osnovu rezultata glasanja, predsjedavajuća je konstatovala da je Dom naroda Parlamenta Federacije BiH, sa 33 glasa za i jednim uzdržanim, usvojio Prijedlog zakona o finansijskom poslovanju.

2. Prijedlog zakona o nedopuštenom oglašavanju

Prijedlog zakona utvrdila je Vlada Federacije.

Prijedlog zakona razmatrala su nadležna radna tijela i dostavila svoje izvještaje.

U raspravi nije niko učestvovao.

Na osnovu rezultata glasanja, predsjedavajuća je konstatovala da je Dom naroda Parlamenta Federacije Bosne i Hercegovine, jednoglasno, sa 34 glasa za, usvojio Prijedlog zakona o nedopuštenom oglašavanju

3. Prijedlog zakona o poljoprivrednoj organskoj proizvodnji

Prijedlog zakona utvrdila je Vlada Federacije.

Na Prijedlog zakona amandman je podnio Đuro Delić.

Vlada Federacije je dostavila izjašnjenje kojim prihvata Amandman.

Amandman glasi:

U članu 35. stav (1) Prijedloga zakona o poljoprivrednoj organskoj proizvodnji mijenja se i glasi:

„(1) Federalno ministarstvo donosi rješenje o upisu u Registre iz člana 34. stav (2) ovog zakona na osnovu zahtjeva subjekta i kada utvrdi da podnositelj zahtjeva ispunjava uvjete iz člana 34. stav (3) ovog zakona uz pisanu saglasnost nadležnog kantonalnog ministarstva za poslove poljoprivrede.“.

Prijedlog zakona razmatrala su nadležna radna tijela i dostavila svoje izvještaje.

U raspravi nije niko učestvovao.

Na osnovu rezultata glasanja, predsjedavajuća je konstatovala da je Dom naroda Parlamenta Federacije BiH, sa 33 glasa za i jednim uzdržanim, usvojio Prijedlog zakona o poljoprivrednoj organskoj proizvodnji.

5. Nacrt zakona o veterinarsko-medicinskim proizvodima

Nacrt zakona utvrdila je Vlada Federacije.

Predstavnički dom Parlamenta Federacije obavijestio je Dom naroda da je na 11. sjednici, održanoj 18. 5. 2016. godine, razmatrao Nacrt zakona o veterinarsko-medicinskim proizvodima i Zaključkom ga prihvatio. Tom prilikom, Nacrt zakona je stavljen na javnu raspravu u trajanju od 90 dana.

Nacrt zakona razmatrala su nadležna radna tijela i dostavila svoje izvještaje.

U raspravi je učestvovao Aner Žuljević.

Na osnovu rezultata glasanja, predsjedavajuća je konstatovala da Dom naroda Parlamenta Federacije BiH, sa 29 glasova za i šest protiv, usvojio sljedeći:

ZAKLJUČAK

1. Dom naroda Parlamenta Federacije Bosne i Hercegovine prihvaća Nacrt zakona o veterinarsko-medicinskim proizvodima i smatra da može poslužiti kao osnova za izradu prijedloga zakona.

2. Zadužuje se predlagač da organizira i provede javnu raspravu u trajanju od 90 dana u skladu sa procedurom propisanom Ustavom Federacije za donošenje zakona iz zajedničke nadležnosti federalne vlasti i kantona.

3. Zadužuje se Vlada Federacije da prilikom izrade prijedloga zakona ima u vidu primjedbe, prijedloge i sugestije iznesene na sjednici Doma naroda kao i one iznesene u okviru javne rasprave.

6. Izvještaj o radu Fonda za profesionalnu rehabilitaciju i zapošljavanje osoba sa invaliditetom Federacije BiH za 2015. godinu, izvještaj o izvršenju finansijskog plana za 2015. godinu

Na osnovu člana 30. Statuta Fonda za profesionalnu rehabilitaciju i zapošljavanje osoba sa invaliditetom („Službene novine FBiH, broj 28/11) Fond je dužan da, do kraja marta tekuće godine, dostavi Izvještaj o radu i Izvještaj o izvršenju finansijskog plana za 2015. godinu.

Fond za profesionalnu rehabilitaciju dostavio je Parlamentu Federacije izvještaje radi razmatranja i prihvatanja.

Izvještaj su razmatrala nadležna radna tijela i dostavila svoje izvještaje.

Izvještaj je obrazložio predstavnik Fonda za profesionalnu rehabilitaciju i zapošljavanje osoba sa invaliditetom.

U raspravi su učestvovali: Slobodan Tomić, predsjednik Kluba delegata bošnjačkog naroda, Osman Ćatić i Tomislav Martinović, predsjednik Kluba delegata hrvatskog naroda. Uime klubova, Ćatić i Martinović predložili su zaključke.

Na osnovu rezultata glasanja, predsjedavajuća je konstatovala da Dom naroda Parlamenta Federacije Bosne i Hercegovine, nije usvojio Izvještaj o radu Fonda za profesionalnu rehabilitaciju i zapošljavanje osoba sa invaliditetom Federacije Bosne i Hercegovine za 2015. godinu sa

Izveštajem o izvršenju finansijskog plana za 2015. godinu, budući da su za glasala 22 delegata, a 17 delegata je bilo uzdržano.

Jasenko Tufekčić izrazio je sumnju u rezultate glasanja te je Izmir Hadžić obavio poimenično glasanje.

Na osnovu rezultata poimeničnog glasanja, predsjedavajuća je konstatovala da Dom naroda Parlamenta Federacije Bosne i Hercegovine, nije usvojio Izveštaj o radu Fonda za profesionalnu rehabilitaciju i zapošljavanje osoba sa invaliditetom Federacije Bosne i Hercegovine za 2015. godinu sa Izveštajem o izvršenju finansijskog plana za 2015. godinu, te da su za glasala 24 delegata, a 16 delegata je bilo uzdržano.

Predsjedavajuća je stavila na glasanje usaglašeni Prijedlog zaključka klubova delegata bošnjačkog i hrvatskog naroda i na osnovu rezultata glasanja, konstatovala da je Dom naroda Parlamenta Federacije Bosne i Hercegovine, sa 28 glasova za, šest uzdržanih glasova i jednim glasom protiv, usvojio sljedeći

ZAKLJUČAK

1. Zadužuje se Vlada Federacije Bosne i Hercegovine da pristupi izmjenama i dopunama Zakona o profesionalnoj rehabilitaciji, osposobljavanju i zapošljavanju osoba sa invaliditetom u Federaciji Bosne i Hercegovine u cilju osiguranja naplate posebnog doprinosa po čl. 18. i 19. Zakona o profesionalnoj rehabilitaciji, osposobljavanju i zapošljavanju osoba sa invaliditetom u Federaciji Bosne i Hercegovine tako što će pristupiti dopunama člana 66. Zakona dodavanjem stava (4) koji bi glasio: „(4) Nadzor nad uplatom posebnog doprinosa iz čl. 18. i 19. Zakona vrši Porezna uprava Federacije Bosne i Hercegovine.“.
2. Poseban naglasak u Nacrtu izmjena i dopuna Zakona o profesionalnoj rehabilitaciji, osposobljavanju i zapošljavanju osoba sa invaliditetom u Federaciji Bosne i Hercegovine trebao bi se odnositi na revidiranje privrednih i pravnih subjekata koji su u obavezi zaposliti osobe sa invaliditetom, kao što su bolnice, domovi zdravlja i ostali pravni subjekti koji obavljaju specifične djelatnosti.

7. Izveštaj o izvršenju Budžeta Federacije BiH za period 1. januar - 31. decembar 2015. godine

Vlada Federacije dostavila je Parlamentu Federacije Izveštaj o izvršenju Budžeta Federacije BiH za period 1. januar - 31. decembar 2015. godine, radi razmatranja i usvajanja.

Predstavnički dom Parlamenta Federacije obavijestio je Dom naroda da je na 11. sjednici održanoj 18. 5. 2016. godine Zaključkom usvojio Izveštaj o

izvršenju Budžeta Federacije BiH za period 1. januar - 31. decembar 2015. godine.

Izveštaj o izvršenju Budžeta razmatrala su nadležna radna tijela i dostavila svoje izvještaje.

Budući da sjednici nije prisustvovao predstavnik predlagača tačka je skinuta s dnevnog reda.

Sjednica je završena u 15:15 sati.

Transkript sjednice čini sastavni dio Zapisnika.

SEKRETAR

Izmir Hadživdić

PREDSJEDAVAJUĆA

Lidija Bradara